

安順書牘

安順書牘摘鈔敘目

同治九年庚午佩紳以貴州候補道攝理安順府夏六月下旬視事冬十一月中旬去計在官六閱月庶富未能謀惟空空託之於教大利未能興惟草草借客兵以除一大害事後追思常以負民爲疚然當其時勞苦憂患固不敢自謂尙有餘力矣文字之可見者粗迹耳故篋中猶存書牘稿若干篇不忍盡棄今摘鈔之各以類編爲三卷光緒四年戊寅冬十一月易佩紳自敘

卷之一

陳地方情形籌民事軍事

請飭汪守速赴本任自願暫畱辦理軍務

報大股賊匪竄踞普定各壘窺伺郡城先後堵禦布
置情形

報陸續布置及籌畫情形

報唐軍到郡或撫或勦請定約

請畱唐道奉撤之四營勦辦上游並自閏十月起籌
給糧饟

陳各營圍逼烏東隴情形請籌供安定營口糧

陳查明沐邵二逆蹤跡暨攻克烏東隴犄角一寨情
形

報擒獲烏東隴各僞逆

報攻破烏東隴情形請保獎各員弁

卷之二

關防條約示

勸諭投誠示

勸諭良民示

勸諭息訟示

招安脅從各寨示

償還捐借銀米並申諭夷漢解仇示

剴切丁寧示

發告示申明團約飭呈清冊札

卷之三

爲天主堂事上黎簡堂方伯林貞伯廉訪

復黎簡堂方伯三則

上簡堂方伯

復簡堂方伯

上林貞伯廉訪

上方伯廉訪

復統領援黔川軍唐鄂生觀察二則

致唐鄂生二則

復清鎮令凌鏡初

上劉韞齋中丞師

以郡事報家兄

卸任後報兄

安順書牘摘鈔卷之一

陳地方情形籌民事軍事

攝府叩辭後出省二十五里卽安順府境沿途察看清鎮安平兩縣情形又因聞府屬鮑家雲山兩團甚得力迂道先往其處體訪一切六月十九日抵府城後延接紳士互相印證一郡情形已得十之五六二十四日接印後披覽新舊公牘考核各種利弊又於本月初四日親往鎮甯州屬新投誠之烏束隴一帶開導漢夷各團民一切情形十得八九矣查安順府轄二廳二州三縣又親轄五起十四枝皆凋殘已極困苦難堪民事軍事皆爲要務初攝府以

爲盡心民事則軍事自鬆自今揆之軍事無章則民事難
舉謹以管見陳之民事之要莫外乎整綱紀申教化除苛
暴問疾苦安未變之善良以感已變之頑梗在上者範已
端道已盡恩已至而毫無遺憾然後在下者令可從刑可
服死可甘而必無異志此攝府以爲盡心民事則軍事自
鬆之初意也顧見今境內之賊叛服靡常境外之賊去來
無定其得力之團僅能自顧本望望以外卽不能保其不
得力之團則望亦不能自保今日此請兵明日被告急由
府自募之練不敷分顧則不得不乞援軍需局其自募者
僅恃捐派倉穀及奉撥畢節小河釐金一成原無一定饒

項其來援者又每由各地方捐派米糧是皆屢取於民卽不能不滋擾於民矣加以自募之練饟項無定則額數難定整頓旣難畫一防勦何由得力其來援者則主客旣判運掉不靈如聞賊到某處請援某處卽使迅速亦須數日其赴援之處必先札飭辦糧及援軍到日或民望已破或賊已遠颺而需糧如故且或別有騷擾是未能救民而先害民矣此軍事無章則民事難舉之見在情形也茲攝府旣蒙委任豈敢畏難而卸責然亦有所籌畫不敢緘默者請憲台詳擇焉竊思安順七屬欲使軍事有章而民事易舉得實數勁旅一千六百人亦稍可藉手蓋親兵百人三

營各五百人也三營可當三路隨分隨合而親兵居中策應焉若以此責成攝府可使一郡肅清而民事自有起色然必實數勁旅一千六百人以楚軍章程計之每月需餼銀九千餘兩卽減半計之亦需四千餘兩不知憲台能爲安順籌此巨款否此攝府有可操之勝算而不敢必者也若但照見今軍事爲之視倉穀釐金之盈絀爲練數之多寡擾民者旣不能除救民者又不可恃內政難立而地方之凋敝者如前外侮忽來而元氣之僅存者又失在憲台雖不苛責以無米之炊在攝府必不安於求收與芻之不得脣焦舌敝而空言不足以爲恩力竭精疲而憂勞必至

於成疾此攝府雖欲勉爲其難而終恐不勝其任者也

請飭汪守速赴本任自願暫留辦理軍務

攝府到任兩月不惟一郡情形已悉卽西路各地方賊勢軍情亦知大概但須各地方官先有以服民夷之心而所用兵練又有懾服之威無騷擾之怨則不難肅清矣今就攝府可以自任而不能兼顧者籌一便宜之法爲憲台陳之攝府兩月以來但舉辦府屬百餘里內之民事軍事粗有頭緒各廳州縣尙只以虛文往復已不勝其勞心目中儘有思到見到之處而無可分之力無可助之人亦徒然抱歉繼此九月以後錢糧考試等事紛至沓來而詞訟仍

不能大減則變幻無常之軍務更安能周到擬請憲台飭汪守炳璈卽赴本任專理民事而暫留攝府辦理軍務凡各屬團練召撫等事皆攝府督辦之見就奉撥畢節小河釐銀一成每月百數十兩及軍需局每月接濟經費銀三百兩並動用倉穀勉強湊養練丁五百人再酌給攝府薪水夫役銀兩相勢量力由近及遠或派弁帶領則指揮可期詳密或親身自往則上下更無隔閡皆較有詞訟錢糧等事羈絆之時更易獲效卽如見在興義府屬之徇逆有聞攝府風聲欲越屬投誠者皆不暇應接若專辦軍務則雖隔屬亦可應接矣又如本屬廳州縣皆不暇親往察看

若專辦軍務則可隨時周歷遍察各官之賢否民夷之情
僞矣專辦數月後如地方安靖或可告撤或酌留弁練交
汪守兼理汪守與攝府相處數月彼此以民事軍務相切
劇必能互有進益不復以軍務生疎爲嫌此係攝府爲地
方急圖安全而免以兼顧債事起見伏祈俯允並飭汪守
速卽束裝乘此錢糧甫將開徵而軍務又正喫緊之時早
相接替既免錢糧之轆轤又免賊蹤之蔓延實爲兩便

報大股賊匪竄踞普定各壘窺伺郡城先後堵禦布
置情形

八月二十八日以岩逆大股竄陷普定之張官余官各壘

高副將伯麟帶練救援先勝後挫情形飛稟憲台請速發
援師或准加募練丁在案查高副將失利雖係眾寡不敵
究有退敗之罪惟念其血戰突圍身受重傷暫從寬宥其
所帶之二百人查有副將張定國熟悉安順地勢賊情素
稱奮勇雖頗遭物議而當此急迫需人之際不能不棄短
取長以期近效已飭令接帶並添足三百人迅速整頓以
救各壘陳副將家貴已募二百人亦令其添足三百人內
外策應參將陳大順專帶親兵以固城防惟探得此股賊
匪既係由平遠郎岱竄來之岩白向黃等逆又有自清鎮
安平竄來之下游各逆數路合股加有本地夷匪勾結實

有三四千之眾見踞張官堡一帶擄割糧穀將有倚爲巢穴而窺伺郡城之意惟有慎重防範相機進剿仍候援師厚集以圖併力掃蕩而靖地方

報陸續布置及籌畫情形

本月初四日以布置情形具稟後初六日彭副將所派祝都司一營到郡永甯州楊署牧亦帶練丁來援初十日祝都司楊署牧率練進紮龍旗塋陳張兩副將率府練進紮馬堡先後遇賊交鋒皆未得手十二日楊署牧聞永甯有警撤練回州矣祝都司旣嫌孤立彭副將又屢來諭令其持重陳張兩將亦自不宜輕進遂令祝張兩軍仍各穩紮

以顧未蔓延之各路陳副將移紮大營盤以顧中路而兼應兩路查張官塋爲已破之地此股賊匪出沒無定若得大軍到齊合圍剿雖不能盡滅亦可痛懲攝府亦不僥倖於賊之速走而自以爲功也此地報賊出境彼地報賊入境張皇於前粉飾於後直以各股賊匪爲養官養將欺上剝民之具攝府自不肯蹈其轍惟心有餘而力難逮且恐見事不深者不能相諒又各團民情聞賊將至則惟恐兵不速來及兵來則諭令辦糧惟恐價之不足卽價雖給足亦恐兵之或擾此又賊匪不可久踞援兵不能過多之情形也伏祈憲台曲加體察如鼎營一軍可辦此賊卽飭

彭副將帶全軍速進以便號令專而蕨事易如毛軍合勦
可期滅賊則旣須發見銀以採辦軍糧又須與彭軍派定
孰正孰副歸併節制方無貽悞均候裁奪飭遵

報唐軍到郡或撫或勦請與定約

九月二十五日彭副將率全軍來郡二十八日進紮龍旗
塋正籌商進勦二十九日接准辦理援黔軍務唐道移開
竊照岩白二酋迭次請撫情形曾經函知貴府在案茲特
札飭于承德楷督帶安定左後副前副後四營五成精銳
於九月二十三日自興隆場取道開州清鎮馳抵安順探
確岩白二酋屯踞何處相機勦辦如果實心受撫便挑其